

ADYAYA I

PURWAKA

1.1 Dadalan Pikobet

Sajeroning paguron-guron wenten parikrama pamlajahan. Pamlajahan kalaksanaang mangda sisia madue kawagedan ri sajeroning kahuripan. Ring pamlajahan punika kawentenan guru dahat mabuat pisan. Guru madue sesana ngajahin tur nincapang kawagedan sisia. Guru sane *kreatif* pastika makarya *metode/pidabdab* miyah nyantenang *media* sane pacang kaanggen mangda tatujuon pamlajahan prasida kapanggih. Punika taler ring paplajahan basa Bali pinaka *muatan lokal*, sampaun sapatutne nganggen *metode pembelajaran* sane anut, mangda pamargin pamlajahan prasida antar miyah nemuang kautaman.

Pamlajahan ring paguron-guron pastika mapai ketan sareng *teknologi*, utaman ipun *teknologi informasi*. Napi malih ring *era revolusi 4.0* puniki pamlajahan prasida kalaksanaang saking dija manten, ngawinang kawigunan *teknologi informasi* dahat mabuat pisan. Punika taler indik pamlajahan *muatan lokal* sakadi basa Bali prasida nganggen *teknologi* pinaka pirantinyane, tur anut sareng *kurikulum pendidikan*.

Manut *Undang-undang No 20/2003* indik *Sistem Pendidikan Nasional, kurikulum* sane kaanggen warsa mangkin inggih punika *Kurikulum 2013* utawi *KI3*. Negesang indik pamargin paplajahan basa Bali, salanturnyane kakaryanin *silabus* paplajahan basa Bali sane madaging *Kompetensi Inti (KI)* miyah *Kompetensi Dasar (KD)* kaanggen pedoman ngamargiang paplajahan. Ring *silabus* punika taler sampaun wenten akeh galah guru polih ngicen paplajahan ring soang-soang *materi*. Indike punika wenten ring *Peraturan Gubernur Bali nomor*

20 warsa 2013 indik *Bahasa, Aksara dan Sastra Daerah Bali pada Pendidikan Dasar dan Menengah*. Sinalih tunggil dagingnyane maosang indik paplajahan basa Bali mangda kaajahin ring samian undagan paguron-guron *dasar* utawi *menengah* pinih kedik kalih jam ring awuku. Kawentenan pinih kedik kalih jam ring sajeroning awuku punika kaaptiang mangda sisia prasida uning tur waged indik samian *materi* sane sampun wenten ring *silabus*. Sakadi pamlajahan matembang sane ngranjing ring soroh puisi Bali purwa taler polih galah *praktek* kalih jam plajahan ring awuku.

Manut ring *Kurikulum 2013* sane kaanggen ring SMA Negeri 1 Kubutambahan, silih sinunggil soroh pamlajahan matembang sane kajahin ring paplajahan basa Bali inggih punika matembang pupuh. Ring wewidangan tembang akeh wenten pupuh, nanging manut Jelantik (2006: 33) sane lumrah wenten pupuh pucung, pupuh ginada, pupuh sinom, pupuh ginanti, pupuh maskumambang, pupuh durma, pupuh adri, pupuh dandang gula, pupuh mijil, pupuh pangkur, miwah pupuh semarandana. Saking makudang-kudang pupuh sane wenten, panilik meled nilikin ri kala sisia nembangang pupuh durma santukan pupuh puniki madue kaluwihan anggen ngawetuang tutur utawi piteket. Pupuh puniki nganggen pitung carik sane pada lingsa tur nganutin uger-uger suara sakadi 12a, 8i, 6a, 8a, 8i, 5a, 7i ring ungkur (Medera, 2007: 11).

Kawagedan matembang pupuh sarat kalaksanaang ring sekolah santukan malarapan antuk matembang, para sisia prasida nguningin teges tembang. Palajahan matembang wenten akeh kawigunannyane majeng ring sang sane nembangang, minakadi prasida nincapang kawagedannyane, prasida ngayah, prasida ngamolihang rasa lega santukan sampun prasida nguningin teges tembang,

napi malih ring sakancan *upacara upakara* sane wenten ring Bali pastika wenten tembang utawi dharma gita.

Yadiastun akeh kawigunan pamlajahan matembang pupuh, nanging nenten akeh sisia sane meled malajah matembang, santukan nenten elah ngingetang elog-elogan tembange, napi malih yening ring manah para sisia nenten kayun matembang. Punika sane ngawinang guru patut ngamargiang paplajahan sane *kreatif* mangda para sisia meled nyarengin palajahan.

Sakadi sane wenten ring sisia kelas XI IBB SMA Negeri 1 Kubutambahan, manut seseleh sane kalaksanaang antuk saduwicara sareng silih sinunggil guru basa Bali SMAN 1 Kubutambahan, Ketut Arya Swastana, S.Pd. ngamolihang *keterangan* yening pamargin paplajahan matembang sampun nginutin *kurikulum* lan *silabus*, nanging pikolih kawagedan matembang pupuh Sisia Kelas XI IBB SMA Negeri 1 Kubutambahan kabao kirang. Panilik nguratiang guru kantun nganggen *metode ceramah*, tur akehan kari nganggen galah sane wenten ring sekolah manten, sasampun nerangang indik teori, guru lan sisia kedik madue galah *praktek*. Sisia wantah kaicen pauruk ping kalih lan ping tiga sane ngawinang sisia nenten waged ring paplajahan matembang. Punika sane ngawinang sisia sukeh malajah matembang. Pinaka imbanjane ring kelas XI IBB, kelas indik *Ilmu Bahasa* lan *Budaya* wantah tigang diri sane mresidayang nembangang pupuh Durma.

Manut sakadi parindikan punika, patut pisan yening ri kala malajah prasida nganggen *metode* miwah piranti pamlajahan sane prasida ngawetuang *motivasi* lan *minat* sisia mangda meled malajah nembangang pupuh. Napi malih ring aab sakadi mangkin sampun kawastanin *era revolusi 4.0*. samian sisia pastika sampun

madue sane mawasta *android* utawi *ios* utawi *komputer*. *Metode* miwah pamlajahan sane kaanggen patut ngawinang *proses* pangajah-ajahan mamargi becik, *efektif, aktif, inovatif, kreatif*, miwah ngawinang bagia. Indik punika manut sakadi sane wenten ring *PP RI No. 19 tahun 2005* indik *Standar Nasional Pendidikan Bab IV Pasal 19 ayat 1* mungguh sakadi ring sor puniki:

“Proses pembelajaran pada suatu pendidikan diselenggarakan secara interaktif, inspiratif, menyenangkan, menantang, memotivasi, peserta didik untuk berpartisipasi aktif, serta memberikan ruang yang cukup bagi prakarsa, kreativitas, dan kemandirian sesuai dengan bakat, minat, dan perkembangan fisik serta psikologis peserta didik.”

Weten makudang-kudang tata cara utawi *metode* miwah piranti sane prasida kaanggen olih guru ri kala ngajahin. *Metode* inggih punika makudang-kudang *teknik* paplajahan sane kaangen pamargi pangajahan ring para sisia (Arifin, 2014:102). Wenten *metode ceramah, metode tanya jawab, metode karya wisata, metode drill* miwah sane tiosan. Mratiaksayang kahanan sisia miwah *metode* guru ngajahin ring kelas XI IBB SMA Negeri 1 Kubutambahan sajeroning paplajahan pupuh karasayang kantun meweh nincapang kawagedan sisia. Malarapan antuk pikobet inucap panilik pacang nganggen silih tunggil *metode* inggih punika *metode drill* ring sajeroning paplajahan nembangang pupuh durma. *Metode drill* inggih punika tata cara ngajahin sisia antuk ngamiletin pauruk (Sriyono, 1992:112). Pauruk punika sane pacang ngawinang sisia prasida ngresepin paplajahan. *Metode drill* pacang nincapang pangresep sisia indik matembang pupuh. Saking penampen sujana ring ajeng, *metode drill* madue artos inggih punika tata cara ngajahin mangda sisia ngamiletin tata cara sane mamargi nglantur tur jakti-jakti malajahin mangda prasida ngresepin napi sane sampun kaplajahin. *Metode drill* becik kaanggen riantukan tata cara malajahnyane kamargiang ngalantur (*berkelanjutan*). Punika mawinan sisia pacang kresep indik

napi sane sampun kaplajahin. *Metode drill* puniki madue tatujuon ngajahin para sisia mangda prasida ngresepin napi sane kaajahin, sumangdane sisia madue kewagedan nembangang pupuh utaminnyane pupuh semarandana. Lianan punika para sisia prasida nglestariang budaya Bali sane pinaka tetamian leluhur.

Lianan teken *metode pembelajaran* guru patut madue piranti sane patut sane kaanggen ri kala ngajahin. *Strategi* utawi *metode* miwah piranti sane jagi kaanggen patut mapaiketan. Silih sinunggil piranti pengajah-ajah sane prasida kaanggen malajah matembang inggih punika *aplikasi zello*. Piranti pamlajahan puniki prasida kaanggen nganggen jaringan *internet*, lan prasida mabebaosan saling sautin ring *chanel* sane sampun kakaryanin. Ri kala nganggen *aplikasi* puniki, sisia nenten kimud yening iwang utawi durung *percaya diri*, santukan *aplikasi* puniki prasida kaanggen ring jero soang-soang lan nenten nyinahang gambar sang sane mabebaosan (Roji, 2018: 106). Kawentenan *aplikasi zello* puniki boyo ja wantah anggen nincapang kawagedan manten nanging prasida kaanggen piranti nglaksanayang pamlajahan sangkaning kahanan *Covid-19*. Beceknyane *aplikasi* puniki prasida mapaiketan sareng *metode drill*.

Tetilikan nganggen *metode drill* puniki boyo je tetilikan sane kapertama. Daweg sane lintang, sampun wenten panilik sane lianan sane nganggen *metode drill*. Sane kapertama tetilikan saking Ni Putu Sri Partami (2016) tetilikannyane mamurda *Metode Drill* Kaanggen Utsaha Nincapang Kawagedan Nyurat Pupuh Ginada Sisia Kelas VII A SMP Negeri 2 Pekutatan, sane nilikin indik kawagedan nyurat. Tetilikan sane kaping kalih wenten I Kade Angga Kukuh Stiawan (2019), *Metode Drill* kaanggen Nincapang Kawagedan Nembangang Pupuh Semarandana Sisia Kelas XI Ilmu Bahasa dan Budaya SMA Negeri 1 Kubutambahan, sane

nilikin indik kawagedan matembang. Tetilikan selanturnyane saking Ni Made Rispiptari (2019) sane mamurda Ngawigunayang *Media Audio Visual* Kaanggen Nincapang Kawagedan Matembang Pupuh Ginada Sisia Kelas X IBB 1 SMA Negeri 3 Singaraja. Tetilikan sane kaping pat saking I Made Wisnawa (2016) sane mamurda Ngawigunayang *Metode Audiolingual* Anggen Nincapang Kawagedan Nembangang Pupuh Maskumambang Sisia Kelas X MIPA 2 SMA Negeri 1 Singaraja. Tetilikan sane kaping lima saking Kadek Arimbawa Arya (2021) sane mamurda *Metode Drill* sajeroning *Aplikasi Google Meet* Kaanggen Nincapang Kawagedan Nembangang Kidung Wargasari Sisia Kelas XI Akuntansi C SMK Negeri 1 Singaraja.

Malarapan antuk dadalan pikobet sane sampun katlatarang ring ajeng, kawentenan *aplikasi zello* sajeroning *metode drill* dahat mabuat pisan kaanggen nincapang Kawagedan Sisia ring paplajahan matembang. Pidabdab nganggen *aplikasi zello* sajeroning *metode drill* puniki pacang nuntun pamargin guru ri kala nagingin paplajahan matembang pupuh. Sisia pacang meled tur ngresep ri kala malajah. Majalaran punika, panilik meled pisan nilikin indik ngawigunaang *Aplikasi Zello* sajeroning *Metode Drill* Kaanggen Nincapang Kawagedan Matembang Pupuh Durma ring Kelas XI IBB SMA Negeri 1 Kubutambahan.

1.2 Ngrereh Pikobet

Sajeroning tetilikan puniki, panilik ngrereh makudang-kudang pikobet sane mapaiketan sareng dadalan pikobet sane sampun kabahbahang ring ajeng. Pikobet sane sampun karereh mangda mapaiketan sareng paplajahan matembang malarapan antuk *aplikasi zello* sajeroning *metode drill* mangda nincapang Kawagedan Sisia matembang pupuh durma. Pikobet sane sampun karereh

minakadi, (1) Sapunapi pidabdab ngawigunaang *aplikasi zello* sajeroning *metode drill* ri kala kaanggen nincapang kawagedan matembang pupuh durma sisia kelas XI IBB SMA Negeri 1 Kubutambahan. (2) Sapunapi pikolih ngawigunaang *aplikasi zello* sajeroning *metode drill* ri kala kaanggen nincapang kawagedan matembang pupuh durma sisia Kelas XI IBB SMA Negeri 1 Kubutambahan. (3) Sapunapi panampen sisia ring *aplikasi zello* sajeroning *metode drill* ri kala nincapang kawagedan matembang pupuh durma sisia kelas XI IBB SMA Negeri 1 Kubutambahan.

1.3 Ngwatesin Pikobet

Sajeroning tetilikan sane lagi kalaksanaang, panilik nureksain malih pikobet sane sampun karereh. Pikobet punika kawatesin santukan wenten makudang-kudang parindikan minakadi, tetilikan kabanda antuk galah, ngicenin galah majeng ring panilik sane lian mangda nyangkepin lan maripurnayang tetilikan puniki miwah sane lianan. Pikobet sane lagi katlatarang wenten sajeroning pikobet ring sor.

1.4 Bantang Pikobet

Malarapan antuk dadalan pikobet ring ajeng, bantang pikobet sane prasida kapolihang inggih punika:

1.4.1. Sapunapi pidabdab ngawigunaang *aplikasi zello* sajeroning *metode drill* ri kala kaanggen nincapang kawagedan matembang pupuh durma sisia kelas XI IBB SMA Negeri 1 Kubutambahan?

1.4.2. Sapunapi pikolih ngawigunaang *aplikasi zello* sajeroning *metode drill* ri kala kaanggen nincapang kawagedan matembang pupuh durma Sisia Kelas XI IBB SMA Negeri 1 Kubutambahan?

1.4.3. Sapunapi panampen sisia ring *aplikasi zello* sajeroning *metode drill* ri kala nincapang kawagedan matembang pupuh durma Sisia Kelas XI IBB SMA Negeri 1 Kubutambahan?

1.5 Tatujon Tetilikan

Malarapan antuk bantang pikobet sane sampun karincikang ring ajeng, tatujon tetilikan puniki inggih punika:

1.5.1. Mangda uning lan prasida nelatarang indik pidabdab ngawigunaang *aplikasi zello* sajeroning *metode drill* ri kala nincapang kawagedan matembang pupuh durma sisia kelas XI IBB SMA Negeri 1 Kubutambahan

1.5.2. Mangda uning lan prasida mahbahang pikolih miwah pangresep sisia kelas XI IBB SMA Negeri 1 Kubutambahan sasampun ngawigunaang *aplikasi zello* sajeroning *metode drill* kaanggen nincapang kawagedan matembang pupuh durma

1.5.3. Mangda uning lan prasida mahbahang indik panampen sisia ring *aplikasi zello* sajeroning *metode drill* ri kala nincapang kawagedan matembang pupuh durma sisia kelas XI IBB SMA Negeri 1 Kubutambahan.

1.6 Kawigunan Tetilikan

Kawigunan tetilikan sane mamurda *Applikasi Zello* sajeroning *Metode Drill* Kaanggen Nincapang Kawagedan Matembang Pupuh Durma ring Kelas XI IBB SMA Negeri 1 Kubutambahan inggih punika:

1.6.1. Kawigunan Pamucuk (*Teoritis*)

Pikolih tetilikan puniki kaaptiang mawiguna ri sajeroning panglimbakan widia (*teori*) indik *aplikasi zello* sajeroning *metode drill* miwah kaweruhan ring widia

paguron-guron, cutetnyane paplajahan basa Bali ngenenin indik matembang pupuh durma.

1.6.2. Kawigunan Panglimbak (*Praktis*)

Kawigunan panglimbak prasida macihna ri kala sepat siku-siku sane kaanggen pacang katelebang. Kawigunan panglimbak ring tetilikan puniki inggih punika:

- a. Majeng ring Sisia

Kawigunan tetilikan puniki majeng ring sisia inggih punika anggen paweweh aji (*ilmu*) mangda sisia uning tur ngresepang indik tata cara matembang pupuh durma

- b. Majeng ring Guru Basa Bali

Kawigunan tatilikan puniki majeng ring guru basa Bali inggih punika prasida uning kawagedan sisia, kaiwangan-kaiwangan, miwah pikobet-pikobet sane kapanggihin ri kala matembang pupuh durma. Risampun uning, guru prasida ngicenin panuntun taler pamargi sane manut ngenenin kakirangan sane kapanggihin olik sisia.

- c. Majeng ring panilik selanturnyane

Pikolihi ring tetilikan puniki kaaptiang mawiguna majeng ring panilik tiosan, anggen bahan pabinayan (*perbandingan*) ri sajeroning tetilikan selanturnyane sane pateh.

- d. Majeng panilik

Pikolihi tetilikan puniki, kaanggen dasar majeng ring panilik ri tatkala benjang pungkur ngajahin ring sekolah-sekolah nganggen *teknologi lan aplikasi* pamlajahan sane anut.